

**ZAKON O FINANSIRANJU ORGANIZACIJA CIVILNOG DRUŠTVA U FEDERACIJI  
BOSNE I HERCEGOVINE**

**I. UVODNE ODREDBE**

**Član 1.**

**(Predmet zakona)**

Ovim zakonom uređuju se načela, oblik, način, opći kriteriji i postupak finansiranja udruženja i fondacija (u daljem tekstu: organizacije civilnog društva) u Federaciji Bosne i Hercegovine, prava i obaveze organizacija civilnog društva u pogledu njihovog finansiranja, nadzor nad primjenom zakona, te druga pitanja od značaja za finansiranje organizacija civilnog društva.

**Član 2.**

**(Primjena zakona)**

Ovaj zakon se primjenjuje na finansiranje svih organizacija civilnog društva koje djeluju u Federaciji Bosne i Hercegovine.

**Član 3.**

**(Značenje pojmova)**

(1) U smislu ovog zakona, korišteni pojmovi imaju sljedeće značenje:

- a) „**organizacije civilnog društva**“ predstavljaju udruženja i fondacije, kako je propisano odredbama Zakona o udruženjima i fondacijama („Službene novine Federacije BiH“, broj 45/02), uključujući udruženja i fondacije registrovana na osnovu propisa Bosne i Hercegovine, Republike Srpske i Brčko Distrikta Bosne i Hercegovine, kao i predstavništva stranih i međunarodnih nevladinih organizacija, koja djeluju na teritoriji Federacije Bosne i Hercegovine ili se finansiraju iz jednog od izvora iz člana 6. ovog zakona;
- b) „**finansiranje organizacija civilnog društva**“ predstavlja sticanje imovine u novcu i drugom obliku koji se može iskazati u novčanoj protuvrijednosti;
- c) „**projekat**“ je skup međusobno povezanih aktivnosti kako bi se ostvarili unaprijed zadani ciljevi u određenom vremenskom razdoblju i utvrđenim finansijskim planom i drugim raspoloživim resursima ;
- d) „**program**“ predstavlja skup projekata i/ili aktivnosti organizacija civilnog društva koji dugoročno doprinose ostvarenju ciljeva poboljšanja kvaliteta i standarda života ciljne grupe koju zastupaju; ;
- e) „**članarina**“ predstavlja novčani iznos čiju visinu i period uplate utvrđuje nadležni organ udruženja, a koju su dužni uplaćivati njegovi članovi isključivo po osnovu statusa svog članstva;
- f) „**donacija**“ predstavlja nenamjenska novčana sredstva koja se dodjeljuju organizacijama civilnog društva za finansiranje njihovih aktivnosti;

- g) „**grant**“ predstavlja namjenska novčana sredstva koja se dodjeljuju organizacijama civilnog društva za finansiranje njihovih aktivnosti;
- h) „**poklon**“ predstavlja nenovčana materijalna dobra koja se dodjeljuju organizacijama civilnog društva za finansiranje njihovih aktivnosti, služe isključivo za obavljanje redovnih poslova za koje su osnovani i mogu se iskazati u novčanoj protuvrijednosti;
- i) „**dividenda**“ predstavlja prihod od dionica ili udjela u dobiti, kao i prihod od drugih prava proisteklih iz vlasništva ili suvlasništva u privrednim društvima;
- j) „**kamata**“ predstavlja prihod od potraživanja od dužnika svih vrsta, bez obzira na vrste osiguranja naplate i bez obzira da li podrazumijevaju pravo na udio u dobiti dužnika, kao i prihodi od vrijednosnih papira koje izdaju organi vlasti kao što su obveznice, uključujući premije i nagrade na takve vrijednosne papire, obveznice ili pozajmice;
- k) „**platna transakcija**“ predstavlja prijenos novčanih sredstava sa jednog na drugi bankovni račun, i to bez obzira da li je prijenos novčanih sredstava između dva računa istog ili različitih klijenata banke;
- l) „**finansijski plan**“ je akt organizacija civilnog društva kojim se utvrđuju prihodi i rashodi za određeni vremenski period;
- m) „**finansijski izvještaj**“ je skup informacija o finansijskom položaju, uspješnosti poslovanja i novčanim tokovima organizacija civilnog društva.

## II. OPĆI DIO

### Član 4.

#### (Načela finansiranja organizacija civilnog društva)

Finansiranje organizacija civilnog društva vrši se u skladu sa sljedećim načelima:

- a) **transparentnosti** koje podrazumijeva otvorenost podataka o izvorima i načinu finansiranja organizacija civilnog društva i načinu njihovog korištenja;
- b) **jednakosti** koje podrazumijeva da se prema svim organizacijama civilnog društva u pravnom prometu postupa na jednak način;
- c) **odgovornosti** koje podrazumijeva da se finansiranje organizacija civilnog društva vrši na društveno odgovoran način koje ne omogućava protupravno ponašanje;
- d) **javni interes** koji podrazumijeva da se finansiranje organizacija civilnog društva vrši na način kojim će se olakšati ili omogućiti provođenje njihovih aktivnosti, a koje su u javnom interesu;
- e) **pravednosti** koji podrazumijeva da se finansiranje organizacija civilnog društva iz budžetskih sredstava organa vlasti vrši isključivo po pravilima ovog zakona, kao i da se finansiranje organizacija civilnog društva iz drugih izvora utvrđenih ovim zakonom vrši po unaprijed utvrđenim kriterijima i bez diskriminacije;
- f) **sprečavanja sukoba interesa** koje podrazumijeva obavezu budnosti i otklanjanja situacija u kojima se privatni interesi bilo kojeg pojedinca u organizacijama civilnog društva ili odgovornog lica kod nosioca njihovog finansiranja sukobljavaju s interesom organizacije, što utiče ili može da utiče na zakonitost, objektivnost i nepristrasnost u njihovom radu.

**Član 5.**  
**(Obaveze i ograničenja)**

- (1) Organizacije civilnog društva obavezne su uredno voditi svoje poslovne knjige i vršiti finansijsko izvještavanje u skladu s posebnim propisima.
- (2) Organizacije civilnog društva dužne su upravljati svojom imovinom s pažnjom dobrog domaćina.
- (3) Organizacije civilnog društva dužne su domaća i inostrana plaćanja finansijskih obaveza izvršavati putem bankovnog računa, u skladu sa propisima o unutrašnjem platnom prometu.
- (4) Članovi organa upravljanja organizacija civilnog društva dužni su se izuzeti od glasanja o imovinskim pitanjima u kojima se njihovi interesi ili interesi njihovih bračnih partnera kao i srodnika u pravoj liniji i do trećeg stepena u pobočnoj liniji sukobljavaju s interesima organizacije. Ukoliko se ne izuzmu od glasanja, takva odluka je ništavna.
- (5) Osnivačima i članovima organizacija civilnog društva, te članovima njihovih organa i drugim odgovornim licima u organizacijama civilnog društva, kao i odgovornim licima kod nosioca finansiranja organizacija civilnog društva zabranjeno je neposredno ili posredno sticanje dobiti ili drugih materijalnih koristi ostvarenih iz registrovane djelatnosti organizacija civilnog društva utvrđenih statutom.
- (6) Ograničenje iz stava (5) ovog člana ne odnosi se na plaće i druge naknade za rad ili plaćanje troškova koja ta lica imaju u vezi s ostvarivanjem ciljeva odnosno vršenjem registrovane djelatnosti organizacija civilnog društva utvrđenih statutom.
- (7) Ograničenja iz ovog člana ne utiču na pribavljanje, uvećanje ili održavanje imovine organizacija civilnog društva.

**III. OBLICI I NAČINI FINANSIRANJA**

**Član 6.**  
**(Oblici finansiranja)**

Finansiranje organizacija civilnog društva moguće je vršiti:

- a) iz članarine, ukoliko se radi o udruženju;
- b) donacijama, grantovima i poklonima od strane domaćih ili stranih fizičkih ili pravnih lica;
- c) iz prihoda stečenim obavljanjem privredne djelatnosti, u skladu sa posebnim propisima;
- d) iz prihoda stečenih od kamata, dividendi, zakupnina, te drugih i sličnih izvora prihoda;
- e) iz budžetskih sredstava organa vlasti;
- f) iz drugih prihoda, stečenih u skladu sa posebnim zakonima.

**Član 7.**  
**(Finansiranje iz članarine)**

- (1) Organizacije civilnog društva koje imaju svoje članstvo, finansiraju se i od prikupljanja članarine od njenih članova.
- (2) Članarina se uplaćuje na bankovni račun organizacije civilnog društva.

- (3) Organizacijama civilnog društva zabranjeno je naplaćivanje novčane naknade za pružanje bilo koje vrste usluge utvrđene standardnom klasifikacijom djelatnosti pod izgovorom članarine.

#### Član 8.

##### **(Finansiranje od donacija, grantova i poklona)**

- (1) Organizacije civilnog društva finansiraju se i putem donacija, grantova i poklona domaćih ili stranih fizičkih ili pravnih lica.
- (2) Ukoliko se organizacijama civilnog društva dodjeljuju donacije ili grantovi, takva sredstva moraju biti uplaćena na njihov bankovni račun.
- (3) Ukoliko se organizacijama civilnog društva dodjeljuju pokloni u vidu nepokretnih ili pokretnih stvari, sredstva opreme ili druga materijalno-tehnička sredstva, isti se koriste isključivo za obavljanje registrovanih djelatnosti.
- (4) Sve nepokretne stvari koje su poklonjene organizacijama civilnog društva za obavljanje registrovanih djelatnosti evidentiraju se u skladu sa posebnim propisima kojima se uređuje evidencija nekretnina.
- (5) Sve pokretne stvari, sredstva opreme ili druga materijalno-tehnička sredstva koja su poklonjena organizacijama civilnog društva za obavljanje registrovane djelatnosti za koje su osnovani, moraju biti uredno evidentirana u poslovnim knjigama u skladu s posebnim propisima kojima se uređuje oblast računovodstva i revizije.

#### Član 9.

##### **(Finansiranje iz prihoda stečenih obavljanjem privredne djelatnosti)**

- (1) Organizacije civilnog društva finansiraju se i putem prihoda ostvarenih vršenjem srodne i nesrodne privredne djelatnosti, u skladu sa odredbama zakona koji uređuje oblast udruženja i fondacija, odnosno privrednih društava.
- (2) Platne transakcije izvršene na osnovu obavljanja privredne djelatnosti iz stava (1) ovog člana vrše se putem bankovnog računa i evidentiraju se u skladu sa propisima kojima se uređuje oblast računovodstva i revizije.
- (3) Organizacijama civilnog društva nije dozvoljeno pružanje usluga ili vršenje poslova na tržišnim osnovama i za koje se plaća naknada, osim na način utvrđen u stavu (1) ovog člana.

#### Član 10.

##### **(Finansiranje od kamata, dividendi, zakupnina, te drugih i sličnih izvora prihoda)**

- (1) Organizacije civilnog društva finansiraju se i prihodima i od kamata, dividendi zakupnina i drugih sličnih prihoda.
- (2) Platna transakcija prihoda iz stava (1) ovog člana vrši se putem bankovnog računa i evidentira se u skladu sa propisima kojima se uređuje oblast računovodstva i revizije.
- (3) Prihodi koje organizacije civilnog društva ostvare od izvora iz stava (1) ovog člana mogu se upotrijebiti samo za obavljanje redovnih poslova za koje su osnovani i koji su za te svrhe predviđeni odredbama statuta.

## Član 11.

### **(Finansiranje iz budžetskih sredstava organa vlasti)**

- (1) Organizacije civilnog društva finansiraju se i iz budžetskih sredstava organa vlasti.
- (2) Finansiranje organizacija civilnog društva iz stava (1) ovog člana vrši se:
  - a) finansiranjem projekata, odnosno programa organizacija civilnog društva i
  - b) statusno finansiranje.
- (3) Finansiranje projekata, odnosno programa organizacija civilnog društva vrši se putem javnog poziva, sa unaprijed utvrđenim pravilima izbora i kriterijima za vrednovanje prijavljenih projekata i programa.
- (4) Statusno finansiranje organizacija civilnog društva vrši se isključivo po osnovu značaja društvenog statusa organizacija civilnog društva, koja se na federalnom odnosno kantonalnom nivou utvrđuje zakonom, a u jedinicama lokalne samouprave odlukom općinskog odnosno gradskog vijeća.

## Član 12.

### **(Finansiranje odabranih projekata odnosno programa)**

- (1) Organi vlasti iz svojih budžetskih sredstava vrše finansiranje odabranih projekata odnosno programa koje provode organizacije civilnog društva isključivo po osnovu utvrđenih prioriternih oblasti od javnog interesa.
- (2) Utvrđivanje prioriternih oblasti od javnog interesa vrši se u trogodišnjim i godišnjim programima rada Vlade Federacije BiH odnosno vlade kantona kao i u jedinicama lokalne samouprave, u skladu sa propisima kojim se uređuje razvojno planiranje i upravljanje razvojem u Federaciji BiH, a novčana sredstva za njihovu realizaciju utvrđuju se u budžetu.
- (3) Osim utvrđivanja pojedinačnih prioriternih oblasti od javnog interesa, u programima rada obavezno se moraju navesti:
  - a) pojedinačno određeni organi uprave i upravne organizacije u čiji djelokrug rada spadaju prioriterni oblasti od javnog interesa;
  - b) ciljevi finansiranja programa odnosno projekata i
  - c) iznos novčanih sredstava za finansiranje programa odnosno projekata.
- (4) Prioriterni oblasti od javnog interesa iz stava (1) ovog člana su unapređenje vladavine prava, zaštita ljudskih prava i sloboda, unapređenje rodne ravnopravnosti, unapređenje obrazovanja, nauke, umjetnosti i kulture, tradicije, afirmacije sporta i zdravih stilova života, unapređenje socijalne i zdravstvene zaštite, promocija i unapređenje borbe protiv korupcije i organizovanog kriminala, poboljšanje statusa i zaštita lica sa invaliditetom i starijih osoba, unapređenje i zaštita položaja djece i omladine, smanjenje siromaštva, promocija i unapređenje turizma, promocija udruživanja građana i volontiranja, zaštita prirodne sredine, unapređenje poljoprivrede i ruralni razvoj, te druge slične oblasti koje budu utvrđene kao oblasti od javnog interesa kako je to propisano odredbama iz stava (2) ovog člana.

### Član 13.

#### **(Opći uslovi za učešće organizacija civilnog društva na javnom pozivu za finansiranje odabranih projekata odnosno programa)**

- (1) Organizacije civilnog društva koje se prijavljuju na javni poziv za dodjelu budžetskih sredstava za finansiranje odabranih projekata odnosno programa moraju ispunjavati sljedeće opće uslove:
- a) da su u skladu sa posebnim zakonom upisani u odgovarajući registar organizacija civilnog društva;
  - b) da je opisu registrovane djelatnosti u statutu navedena društvena oblast za koju se iz budžetskih sredstava finansiraju odabrani projekti odnosno programi za koje je objavljen javni poziv;
  - c) da je za proteklu godinu u odnosu na godinu u kojoj je objavljen javni poziv održana sjednica nadležnog upravnog tijela organizacije civilnog društva na kojoj je usvojen finansijski izvještaj u skladu sa propisima kojima se uređuje oblast računovodstva i revizije kao i izvještaj o radu;
  - d) da je održana sjednica nadležnog upravnog tijela organizacije civilnog društva u skladu sa odredbama statuta i da su izabrani organi;
  - e) da su izmirene sve finansijske obaveze organizacije civilnog društva utvrđene propisima kojima se uređuje oblast javnih prihoda;
  - f) da je za proteklu godinu odnosno godinu u kojoj je objavljen javni poziv organizacija civilnog društva predala finansijski izvještaj Finansijsko informatičkoj agenciji.
  - g) da članovi organa organizacija civilnog društva i njihovi srodnici u pravoj liniji do trećeg stepena nisu u krvnom niti tazbinskom srodstvu sa rukovodiocima organa vlasti koji iz svojih budžetskih sredstava finansiraju odabrane projekte odnosno programe.
- (2) Neispunjavanje bilo kojeg od općih uslova iz stava (1) ovog člana isključuje organizacije civilnog društva iz daljeg postupka izbora i dodjele budžetskih sredstava za finansiranje odabranih projekata odnosno programa na koje se prijavljuju.

### Član 14.

#### **(Posebni uslovi javnog poziva za finansiranje odabranih projekata odnosno programa)**

- (1) Javni poziv za dodjelu budžetskih sredstava za finansiranje odabranih projekata odnosno programa, mora sadržavati i sljedeće posebne uslove:
- a) prijavu na javni poziv koja obavezno sadržava:
    - naziv podnosioca prijave u skladu sa nazivom iz registracije kod nadležnog organa za registar organizacija civilnog društva,
    - podatke o glavnom bankovnom računu,
    - imena i kontakt podatke članova organa organizacija civilnog društva, uz navođenje nositelja ovlaštenja za zastupanje i predstavljanje kako je to utvrđeno statutom,
    - podatke o stručnom osoblju koje će izvoditi planirane aktivnosti i njihove biografije,
    - podatke i dokaze iz kojih se može vidjeti posjedovanje iskustva u realizaciji ranijih projekata odnosno programa,

- dokaze o posjedovanju dozvola za realizaciju određenih aktivnosti unutar projekta odnosno programa, za koje je prema nekom posebnom propisu obavezujuće posjedovanje takvih dozvola.
  - b) prijedlog projekta odnosno programa za koji je objavljen javni poziv, a koji obavezno sadržava:
    - detaljan opis predloženog projekta odnosno programa i obrazloženje njegove direktne veze sa utvrđenim prioriternim oblastima od javnog interesa koje su predmet javnog poziva,
    - jasno utvrđene projektne odnosno programske ciljeve i način njihovog ostvarenja,
    - vremenski rok realizacije projekta odnosno programa sa jasno određenim kalendarom aktivnosti,
    - numerički izražen redoslijed pojedinačnih aktivnosti,
    - jasno utvrđene koristi realizacije projekta odnosno programa, te ciljnih društvenih grupa na koje se odnosi.
  - c) prijedlog budžeta za realizaciju projekta odnosno programa, a koji obavezno sadržava:
    - ukupnu vrijednost realizacije projekta odnosno programa,
    - detaljan prikaz troškova po redoslijedu pojedinačnih aktivnosti,
    - prijedlog alternativnih izvora finansiranja projekta odnosno programa,
    - dokaze o već osiguranim novčanim sredstvima iz drugih izvora za finansiranje projekta odnosno programa, ako postoje.
- (2) Neispunjavanje bilo kojeg od posebnih uslova iz stava (1) ovog člana isključuje organizacije civilnog društva iz daljeg postupka izbora i dodjele budžetskih sredstava za finansiranje odabranih projekata odnosno programa na koje se prijavljuju.

#### Član 15.

#### **(Obaveze nositelja finansiranja)**

- (1) Organi uprave i upravne organizacije u čiji djelokrug rada spadaju prioriternne oblasti od javnog interesa dužne su u svom budžetu planirati novčana sredstva za njihovo finansiranje, u skladu sa programima iz člana 12. stav (2) ovog zakona.
- (2) Organi uprave i upravne organizacije novčana sredstva iz stava (1) ovog člana mogu dodjeljivati organizacijama civilnog društva isključivo putem javnog poziva koji se mora objaviti na njihovoj internet stranici i u najmanje dva dnevna lista koja se distribuiraju na cijelom teritoriju Federacije BiH. Javni poziv mora da sadrži:
- a) naziv organa;
  - b) naziv prioriternne oblasti od javnog interesa za koju se dodjeljuje novčana sredstva;
  - c) očekivane ciljeve projekta odnosno programa;
  - d) iznos novčanih sredstava koja se dodjeljuju iz budžeta, kao i minimalni i maksimalni iznosi transfera koji se dodjeljuju;
  - e) kriterije za bodovanje i izbor organizacija civilnog društva;
  - f) pravo na žalbu i uputstvo o načinu njenog podnošenja i
  - g) adresu i rok za podnošenje prijave.
- (3) Za provođenje javnog poziva, bodovanje i izbor organizacije civilnog društva, organi uprave i upravne organizacije dužni su formirati komisiju sastavljenu od najmanje tri člana i koja imaju potrebna znanja o značaju projekta odnosno programa, očekivanim ciljevima

njegovog provođenja, te provođenju finansijskog izvještavanja i nadzora nad finansijskim poslovanjem.

- (4) Komisija iz stava (3) ovog člana svoju odluku o bodovanju i izboru organizacije civilnog društva koja će provoditi prijavljeni projekt odnosno program objavljuje na internet stranici i na oglasnoj ploči organa, a o tome elektronskim putem obavještava prijavljene organizacije civilnog društva.
- (5) Organizacije civilnog društva koje su nezadovoljne odlukama komisije iz stava (3) ovog člana, mogu podnijeti žalbu rukovodiocu organa uprave odnosno upravne organizacije u roku od 8 dana od dana prijema obavijesti iz stava (4) ovog člana.
- (6) Odluku po žalbi iz stava (5) ovog člana rukovodilac organa uprave odnosno upravne organizacije dužan je donijeti u roku od pet dana od dana isteka roka za žalbu, koja je konačna.
- (7) Sa izabranim organizacijama civilnog društva, organ uprave odnosno upravna organizacija u roku od deset dana od dana konačnosti odluke po žalbi iz stava (6) ovog člana, potpisuje ugovor o realizaciji projekta odnosno programa u kojem se određuje način i dinamika korištenja dodijeljenih budžetskih sredstava, kalendar aktivnosti izabranih korisnika, način izvještavanja o provođenju projekta odnosno programa, te nadzor nad njegovom realizacijom. Ugovor obavezno sadrži i odredbe kojim se utvrđuje obaveza povrata dodijeljenih sredstava, ako dođe do djelimične ili potpune nerealizacije projekta odnosno programa ili do zloupotrebe dodijeljenih sredstava.
- (8) Organi uprave i upravne organizacije na svojoj internet stranici obavezno objavljuju informaciju o projektima odnosno programima koje finansiraju iz svog budžeta, organizacije civilnog društva koje provode pomenute projekte odnosno programe i iznos novčanih sredstava dodijeljenih tim organizacijama. Ova informacija mora biti vidljiva na njihovoj internet stranici tokom cijelog vremenskog perioda u kojem se provodi projekat odnosno program.
- (9) Nadzor nad provođenjem realizacije projekata odnosno programa koja se finansiraju iz budžeta organa uprave odnosno upravne organizacije vrši rukovodioc organa uprave. odnosno upravne organizacije.

#### Član 16.

##### **(Ograničenja finansiranja projekata odnosno programa)**

- (1) Organizacije civilnog društva koje su na javni poziv prijavile više projekata odnosno programa, mogu biti izabrane za finansiranje samo jednog prijavljenog projekta odnosno programa.
- (2) Ukupan iznos budžetskih sredstava koja se na osnovu jednog javnog poziva dodjeljuju izabranim organizacijama civilnog društva za finansiranje projekata odnosno programa, ne može iznositi više od 20% od ukupno planiranih sredstava koja se dodjeljuju na osnovu tog poziva.
- (3) Ograničenje iz stava (2) ovog člana neće se primijeniti u slučaju ako visina budžetskih sredstava osiguranih za ovu namjenu ne prelazi 50.000,00 KM.
- (4) Izuzetno od stava (2) ovog člana, iznos budžetskih sredstava koja se na osnovu jednog javnog poziva dodjeljuju izabranim organizacijama civilnog društva za finansiranje projekata odnosno programa može iznositi i do 50% od ukupno planiranih sredstava koja se dodjeljuju na osnovu tog poziva, ali takva odluka mora biti posebno obrazložena.



- (5) Izuzetno od stava (3) ovog člana, iznos budžetskih sredstava koja se na osnovu jednog javnog poziva dodjeljuju izabranim organizacijama civilnog društva za finansiranje projekata odnosno programa može iznositi i preko 50% od ukupno planiranih sredstava koja se dodjeljuju na osnovu tog poziva, ali pod uslovom da su se na javni poziv prijavile najviše dvije organizacije civilnog društva i da je međusobna razlika u njihovom bodovanju veća od 50 % od ukupnog broja mogućih bodova.
- (6) Organizacije civilnog društva koje su izabrane na javnom pozivu za provođenje projekta odnosno programa, mogu za isti projekt odnosno program biti finansirane i od drugih organa vlasti u Federaciji BiH, ali na drugim nivoima u odnosu na onaj nivo na kojem su već izabrane za njegovo provođenje.
- (7) Ograničenje iz stava (6) ovog člana neće se primijeniti na one organizacije civilnog društva sa programom sa više različitih projekata koji tretiraju odnosno obuhvataju više različitih oblasti.

#### Član 17.

##### **(Obavezni kriteriji za izbor organizacija civilnog društva)**

- (1) Obavezujući kriteriji iz člana 11. stav (3) ovog zakona za izbor organizacija civilnog društva i raspodjelu sredstava za finansiranje projekata odnosno programa su:
  - 1) ocjena stepena doprinosa prijavljenog projekta odnosno programa ostvarivanju javnog interesa u određenoj oblasti;
  - 2) ocjena samoodrživosti projekta odnosno programa nakon isteka finansiranja iz budžetskih sredstava;
  - 3) ocjena kadrovskih, stručnih i iskustvenih kapaciteta organizacija da realizuju projekat odnosno program;
  - 4) posjedovanje preporuka i pozitivnih ocjena ranijih nosioca finansiranja prijavljenih organizacija civilnog društva za realizaciju drugih projekata odnosno programa;
  - 5) postojanje drugih izvora finansiranja projekta odnosno programa.
- (2) Organi uprave i upravne organizacije koji dodjeljuju novčana sredstva organizacijama civilnog društva za realizaciju projekta odnosno programa mogu, pored kriterija iz stava (1) ovog člana utvrditi i druge kriterije za dodjelu novčanih sredstava, ali oni ne mogu biti bodovani više od 30 % od ukupnog broja mogućih bodova koji se dodjeljuju prijavljenim organizacijama civilnog društva.

## **IV. PRIMJENA ZAKONA NA DRUGE SUBJEKTE**

#### Član 18.

##### **(Drugi subjekti)**

Odredbe ovog zakona shodno se primjenjuje i na finansiranje organizacija civilnog društva iz sredstava javnih preduzeća, javnih ustanova i drugih subjekata u većinskom vlasništvu Federacije, kantona i jedinica lokalne samouprave.

## **V. NADZOR NAD PRIMJENOM OVOG ZAKONA**

### **Član 19. (Nadzor)**

- (1) Nadzor nad primjenom ovog zakona vrši Porezna uprava Federacije Bosne i Hercegovine i budžetska inspekcija Federalnog ministarstva finansija odnosno kantonalnih ministarstava finansija, svako u okviru svojih nadležnosti.
- (2) Organi uprave, upravne organizacije kao i organizacije civilnog društva iz člana 2. ovog zakona dužni su se u provođenju ovog zakona pridržavati propisa koji uređuju oblast sprečavanja pranja novca i finansiranja terorističkih aktivnosti.

## **VI. KAZNE NE ODREDBE**

### **Član 20.**

- (1) Novčanom kaznom u iznosu od 5.000,00 KM do 15.000,00 KM kaznit će se za prekršaj organizacija civilnog društva:
  - a) ako ne vodi poslovne knjige i ne vrši finansijsko izvještavanje (član 5. stav (1));
  - b) ako osnivači i članovi organizacija civilnog društva, te članovi njihovih organa i druga odgovorna lica u organizacijama civilnog društva, neposredno ili posredno stiču dobit ili druge materijalne koristi ostvarene iz registrovane djelatnosti organizacija civilnog društva utvrđene statutom (član 5. stav (5));
  - c) ako se vrše platne transakcije suprotno ovom zakonu (član 5. stav (3), član 7. stav (3), član 8. stav (2), član 9. stav (2) i član 10. stav (2));
  - d) ako vrši naplatu stručnih usluga i korištenje novčanog prihoda suprotno ovom zakonu (član 7. stav (3));
  - e) ako ne vrši popis imovine i obaveza (član 8. stav (5));
  - f) ako prihode ostvarene iz privredne djelatnosti koristi suprotno ovom zakonu (član 9. stav (1));
  - g) ako pruža usluge ili obavlja druge poslove na tržišnim osnovama suprotno odredbama ovog zakona (član 9. stav (3));
  - h) ako prihode ostvarene iz kamata, dividendi, zakupnina i drugih sličnih izvora koristi suprotno ovom zakonu (član 10. stav (3));
- (2) Za prekršaje iz stava (1) ovog člana kaznit će se i odgovorno lice u organizaciji civilnog društva novčanom kaznom u iznosu od 2.000,00 KM do 6.000,00 KM.

### **Član 21.**

- (1) Novčanom kaznom u iznosu od 3.000,00 KM do 9.000,00 KM kaznit će se za prekršaj odgovorno lice u organu uprave i upravnoj organizaciji kao i u subjektu iz člana 18. ovog

- zakona, ako vrši finansiranje organizacija civilnog društva suprotno odredbama ovog zakona (član 11. stav (2), član 12. stav (1), član 13. stav (2), član 14. stav (2), član 15. st. (2) i (3), član 16. st. (2), (4) i (5) i član 17. st. (1) i (2));
- (2) Novčanom kaznom u iznosu od 1.000,00 KM do 3.000,00 KM kaznit će se za prekršaj odgovorno lice u organu uprave i upravnoj organizaciji, ako ne objavi podatke u skladu sa ovim zakonom (član 15. stav (8)).

## **VII. PRIJELAZNE I ZAVRŠNE ODREDBE**

### **Član 22. (Započeti postupci dodjele budžetskih sredstava)**

Odredbe ovog zakona neće se primjenjivati na postupke dodjele budžetskih sredstava za finansiranje projekata odnosno programa organizacija civilnog društva koji su započeli do dana stupanja na snagu ovog zakona.

### **Član 23. (Stupanje na snagu)**

Ovaj zakon stupa na snagu osmog dana od dana objavljivanja u "Službenim novinama Federacije BiH".